

Samningur

Aðilar að þessum samningi eru Landspítali - háskólasjúkrahús (LSH) kt. 300500-2130, Eiríksgötu 5, Reykjavík og Heilsugæslan (HR) kt. 521094-2069, Barónsstíg 47, Reykjavík.



I. kafli. Almennt.

1. gr.

LSH og Heilsugæslan í Reykjavík gerðu með sér samkomulag þann 26. júní 1999 varðandi deildir sem önnuðust mæðravernd. Með samkomulaginu ákváðu þessir aðilar að sameina starfsemi göngudeildar Kvennadeildar Landspítalans og mæðradeildar Heilsuverndarstöðvar Reykjavíkur undir stjórn Heilsugæslunnar, en með sameiginlegri faglegri leiðsögn. Starfsemin hefur síðan farið fram undir nafninu “Miðstöð mæðraverndar” (MM).

Í samningi þessum er kveðið nánar á um fyrirkomulag hinnar sameinuðu starfsemi, hlutverk og stjórnun hennar. Er það þáttur í fjölþættu samstarfi Heilsugæslunnar og LSH.

Aðilar eru sammála um að Miðstöð mæðraverndar verði rekin af faglegum metnaði og ávallt sé tryggður nauðsynlegur aðbúnaður í samræmi við það.

Við gerð samstarfssamnings milli Heilsugæslunnar og Háskóla Íslands verður tekið tillit til ákvæða þessa samnings.

II. kafli. Miðstöð mæðraverndar.

2. gr.

Tilgangur mæðraverndar er að gæta heilsu og velferðar móður, barns og fjölskyldu með eftirliti, stuðningi, fræðslu og því að greina og meðhöndla frávík frá eðlilegri meðgöngu. MM sinnir sérhæfðri fagþjónustu og er skipulögð sem sérhæfð þjónustumiðstöð fyrir allt landið. MM skal styðja það markmið HR að meðgöngu án áhættuþátta sé í vaxandi mæli sinnt á heilsugæslustöðvum.

3. gr.

MM er samræmingaraðili allrar mæðraverndar og skal starfa sem hluti af heilsugæslu og í beinum tengslum við helstu fæðingastofnun landsins, Kvennadeild LSH. MM skal m.a. sinna eftirtöldum verkefnum:

- Sérhæfðri mæðravernd, þ.m.t. móttöku kvenna með vandamál og sjúkdóma í meðgöngu.

- Almennri mæðravernd ljósmæðra og sérfræðilækna í fæðinga- og kvensjúkdómafræði.
- Þjónustu og ráðgjöf við starfsfólk annarra heilbrigðisstofnana sem vinnur við mæðravernd.
- Útgáfu klínískra leiðbeininga og annars faglegs fræðslu- og kynningarefnis vegna mæðraverndar.
- Foreldrafræðslu, útgáfu og samræmingu á fræðsluefni til verðandi foreldra.
- Næringarráðgjöf.
- Félagsráðgjöf.
- Ráðgjöf sjúkrahjálfara.
- Rannsókn- og fræðastörfum í mæðravernd og á skyldum sviðum.
- Menntun og endurmenntun fagstétta í mæðravernd.
- Samstarfi við samsvarandi mæðradeildir erlendis.
- Öðrum skyldum verkefnum tengdum mæðravernd.

III. kafli.

Samstarfsnefnd

4. gr.

Samstarfsnefnd er skipuð við miðstöðina. Hlutverk hennar er að hafa eftirlit með framkvæmd samnings þessa og að markmiðum hans verði náð. Helstu markmið samningsins eru verkefni sem talin eru í 3. gr. auk þess að stuðla að flutningi mæðraverndar án áhættuþátta út á heilsugæslustöðvar, samræmingu á mæðravernd innan HR, eflingu á samvinnu og tengslum við Kvennadeild LSH. Þá skal nefndin hafa eftirlit með almennri starfsemi stöðvarinnar, gæðamálum, mönnun og verkaskiptingu milli miðstöðvarinnar og Kvennadeildar LSH.

Rísi ágreiningur í samstarfsnefndinni og niðurstaða næst ekki er heimilt að skjóta ágreiningsefnum til framkvæmdastjórna aðila samningsins eftir því sem við á.

Samstarfsnefnd er skipuð tveimur aðilum frá LSH, prófessorum í fæðinga- og kvensjúkdómafræði, er hann jafnframt formaður nefndarinnar, og yfirlækni meðgöngu, fæðingar og sængurlegu á LSH.; þremur aðilum frá HR, yfirlækni og yfirljósmóður MM og einum aðila úr framkvæmdastjórn HR og er hann jafnframt varaformaður. Nefndin er skipuð til þriggja ára í senn. Forstjórar LSH og HR tilnefna hvor um sig varamenn fyrir sína stofnun.

Samstarfsnefndin skal funda svo oft sem þurfa þykir en ekki sjaldnar en fjórum sinnum á ári. Yfirstjórn heilsugæslunnar leggur til fundaaðstöðu og fundaritara.

Þegar málefni MM sem varða samning þennan eru til umræðu hjá framkvæmdastjórnnum aðila samnings þessa skal það gert í samráði við formann samstarfsnefndar.

Yfirljósmóðir og yfirlæknir kynna nýjungar, breytingar og vísindarannsóknir sem fyrirhugaðar eru í MM fyrir samstarfsnefndinni.

IV. kafli.

Um samstarf Miðstöðvar mæðraverndar, LSH og menntastofnana.

5. gr.

Miðstöð mæðraverndar starfar í tengslum og samvinnu við LSH. Á LSH er miðstöð fyrir fósturgreiningar og þar er enn fremur dagdeildar- og legudeildstarfsemi fyrir konur með sjúkdóma á meðgöngu. Á kvennadeild eru framkvæmdar allar venjubundnar og sérhæfðar ómskoðanir auk þess legvatnsástungur, fylgjuvefssýnatökur og sérhæfðar greiningaraðgerðir.

Þá veitir LSH MM þjónustu næringarráðgjafa og sjúkráþjálfara. Ráðgjöf annarra sérfræðinga /sérfræðilækna og þjónusta sérhæfðra deilda vegna alvarlega fyrirverandi og nýtilkominna sjúkdóma í meðgöngu skal vera á hendi LSH.

Aðilar munu hafa samstarf um þessa starfsemi og með því móti reyna að tryggja bestu þjónustu fyrir þá sem hennar njóta á sama fjárhagslega grunni og gildir á deildum/sviðum LSH og samkvæmt reglum sem í gildi eru hverju sinni innan heilbrigðisþjónustunnar varðandi greiðsluþátttöku kvenna í mæðravernd.

6. gr.

MM er kennslu- og rannsóknarstöð í samstarfi við LSH, Háskóla Íslands og aðrar menntastofnanir. Þar fer fram kennsla ljósmæðranema, læknanema og annarra heilbrigðisstétta, ásamt símenntun heilbrigðisstarfsfólks. Stefnt skal að nánari tengslum við Háskóla Íslands í gegnum kennslustöður í ljósmóðurfræði og í fæðinga- og kvensjúkdómafræði og samninga heilsugæslunnar við Háskóla Íslands. Í hlutverki kennslustofnunar felst aðgangur nemenda að klínísku námi innan miðstöðvarinnar og heilsugæslunnar, þ.m.t. bóka- og nýsigagnakosti.

Starfsmenn MM og LSH hafa aðgang að fræðslufundum hvers annars án endurgjalds. Námskeið og ráðstefnur eru undanþegin þessu ákvæði.

Óski starfsmenn kvennadeildar LSH eða MM eftir því að fá að nota efnivið hvers annars til vísindarannsókna verður farið með umsóknir þeirra eins og um starfsmenn viðkomandi stofnunar sé að ræða.

V. kafli.

Um starfsfólk, fjármál aðstöðu og fl.

7. gr.

Heilsugæslan ber ábyrgð á rekstri miðstöðvarinnar og kostnaði sem af henni fellur nema öðruvísi sé sérstaklega kveðið á um í samningi þessum, sbr. 5. grein. Sé gert sérstakt samkomulag um tiltekna þætti þjónustunnar og greiðslu kostnaðar við hana, skal slíkt fylgja þessum samningi í formi viðauka.

VI. kafli.
Um gildistöku o.fl.

8. gr.

Samningur þessi gildir frá 1. júní 2004. Jafnframt fellur úr gildi samningur milli aðilanna, sem tók gildi 1. október 1999. Samningurinn gildir til 5 ára og framlengist til eins árs í senn verði honum ekki sagt upp með sex mánaða fyrirvara af hálfu annars hvors aðila. Verði honum sagt upp ber uppsagnaraðila að tilkynna það skriflega til Landlæknis innan tveggja vikna frá uppsögn.

Reykjavík 3. júní 2004.

f.h. Landspítala - háskólasjúkrahúss
Magnús Pétursson

f.h. Heilsugæslunnar
Guðmundur Einarsson

Bókun 1.

Aðilar samnings þessa eru sammála um að vinna að stofnun fagráðs mæðraverndar með aðild Landlæknisembættisins.

Bókun 2.

Samningsaðilar eru sammála um að þörf sé fyrir 25% starf félagsráðgjafa og viðbótarstörfum ráðgefandi sjúkraþjálfara sem nemur 20% og næringarráðgjafa sem nemur 15% starfshlutfalli.

Viðauki 1.

Hlutdeild LSH í starfsemi MM verður sem hér segir:

Sérfræðilæknar í fæðinga- og kvensjúkdómafræði á Kvennadeild LSH sinna mæðravernd á Miðstöð mæðraverndar sem nemur 0,9 stöðugildi. Heimilt er að deildarlæknar í sérfræðinámi sinni hluta af þessu starfi. Aðilum samnings þessa eru ljósir erfiðleikar Kvennadeildar LSH við að uppfylla þetta ákvæði tímabundið. Verður nánari útfærsla á þessari þjónustu því á vettvangi samstarfsnefndar.

Næringarráðgjöf sem nemur 10% stöðugildi og sjúkraþjálfun sem nemur 5% stöðugildi skal veitt af LSH á MM..

Yfirmaður þeirra í starfi á Miðstöð mæðraverndar er yfirlæknir stöðvarinnar.

Viðauki 2.

Við gerð samnings þessa eru eftirtalin stöðugildi við MM: 1,0 stöðugildi yfirljósmóður, 10,2 stöðugildi ljósmæðra, 0,7 stöðugildi yfirlæknis, 0,8 stöðugildi sérfræðilækna í fæðinga og kvensjúkdómafræði og 2,7 stöðugildi móttökuritara.